

<><><><><><>

### Headlines

- 1- झारखंड विधानसभा दे चुनांस दे पैहले गेड़ दा मतदान अज्ज जारी ऐ। वायनाड लोकसभा सीट ते 10 होरनें राज्यें च विधानसभा हल्के पर उपचुनां बी अज्ज होआ करदे न।
- 2- मुखमंत्री उमर अब्दुल्ला होरें आखेआ ऐ जे सिंधु जल समझौते दे कारण जम्मू-कश्मीर अपनी पन बिजली उत्पादन समर्था दा पूरा इस्तेमाल नेई करी सकदा।
- 3- उत्तरी कमानाध्यक्ष होरें 16 कोर मुख्यालय च सुरक्षा स्थिति दी समीक्षा कीती। जम्मू दे एडीजीपी हारें बसंतगढ़ च सुरक्षा कारवाइएँ गितै तैयारिएँ दा जायजा लैता।
- 4 खेड़ मंत्री होरें आखेआ जे सरकार प्रतिभाशाली हुनरमंद खडारिएँ गी बढ़ावा देने लेई बचनबद्ध ऐ।
- 5 लेबर कमीशनर होरें उद्योगिक इकाइएँ गी पंजीकरण कराने लेई 20एँ दिनें दा नोटिस जारी कीता ऐ।

<><><><><><>

### Polling

झारखंड विधानसभा चुनांस दे पैहले चरण च अज्ज 15एँ जिलेँ दिएं 43 सीटें पर सख्त सुरक्षा प्रबंधें हेठ मतदान जारी ऐ। 31एँ सीटें दे 950 संवेदनशील बूथ गी छोड़ियै होरनें सभ्भनें थाहें पर मतदान संझा 5 बजे खत्म होग जदके राज्य दे संवेदनशील बूथ पर संझा 4 बजे तगर मतदान होग। इस चरण च 1 करोड़ 37 लक्ख शा मते मतदाता 73 महिलाएं सने 683 मेदवारें दे सियासी भविष्य दा फैसला करडन। एहदे अलावा मुख्य दे 11एँ राज्यें दिएं 33 असैम्बली सीटें सने केरल दी वायनाड संसदी सीट लेई बी अज्ज गै उपचुनांस होआ करदा ऐ। इंदे च राजस्थान दिआं 7 असैम्बली सीटां, पच्छिम बंगाल दिआं 6, असम दिआं 5, बिहार दिआं 4, कर्नाटक दिआं 3 ते मध्य प्रदेश ते सिक्किम दिआं 2-2 असैम्बली सीटां शामिल न। एहदे अलावा केरल, छत्तीसगढ़, गुजरात ते मेघालय दी 1-1 असैम्बली सीट लेई बी अज्ज गै उपचुनांस तैहत वोट पा जा'रदे न।

<><><><><><>

### CM-Indus Treaty

मुखमंत्री उमर अब्दुल्ला होरें कल सिंधु जल समझौते दिएं दिक्कतें गी उजागर कीता जेदे कारण जम्मू-कश्मीर च सुददे दरयाएं दा पानी होने दे बावजूद बी अस्स पन बिजली उत्पादन लेई इंदा पूरा इस्तेमाल नेई करी सका रनेआं, कीजे इस समझौते च दरयाएं दा पानी रोकने पर किश बंदशां न। उनें आखेआ जे इस समझौते दिएं बंधशें दे चलदे जम्मू-कश्मीर गी भारी कीमत चुकानी पौंदी ऐ कीजे बिजली उत्पादन दी सुददी समर्थ होने दे

बावजूद बी एहदा फैयदा हासल नेई कीता जाई सकदा ते लोकें गी बिजली दी कमी दे कारण बड़ी मती कठिनाई दा सामना करना पौंदा ऐ, टकोहदा करियै स्याले दौरान। मुखमंत्रि जिंदे कश बिजली मैहकमे दी जिम्मेदारी बी ऐ, होरें बक्ख राज्यें ते केंद्र शासित प्रदेशें दे बिजली मंत्रिं दे सम्मेलन च एह गल्ल आक्खी जेहदी अध्यक्षता केंद्री बिजली मंत्री मनोहर लाल होर करा रदे हे। उमर होरें इस समझौते दिएं उनें बंदशें गी उजागर कीता जिंदे चलदे जम्मू-कश्मीर अपने दरयाएं दे पन बिजली उत्पादन समर्था दा पूरा-पूरा इस्तेमाल नेई करी सकदा। उनें इस कसर गी पूरा करने लेई केंद्र कोला जम्मू-कश्मीर लेई विशेश मुआवजे दी मंग कीती ते इस्तेमाल नेई कीती गेदी पन बिजनी उत्पादन क्षमता दा पूरा लाह लैने लेई माली सहायता दी बी गल्ल रक्खी। उमर अब्दुल्ला होरें P.E.S.L. ते राश्ट्रीय ताप उर्जा निगम गी जम्मू-कश्मीर च R.D.S.S. स्कीम दे चलदे जम्मू-कश्मीर गी होने आहले घाटे गी घट्ट करने गितै कम्में च तेजी आहनने लेई जवाबदेह बनाने लेई आखेआ।

<><><><><><>

### Army-Commander

फौज दी उत्तरी कमान दे अध्यक्ष लेफ्टिनेंट जनरल एम.वी सुचिंद्र कुमार होरें जम्मू दे नगरौटा च व्हाईट नाइट कोर दा दौरा लाया ते संचालन मृतल्लक तैयारियें दा जायजा लैता। उधमपुर आधारित उत्तरी कमान दे जनरल आफिसर कमांडिंग इन चीफ हूँदा 16 कोर दे सदर दफ्तर दा एह दौरा ओल्लै लग्गा ऐ जेल्ले किश्तवाड़ जिले दे दूर-दरेडे जंगली इलाके च आतंक विरोधी कार्रवाइयें च तेजी आई गेई ऐ। पिछले 5एं दिनें च 2 बक्ख-बक्ख आतंकी घटनाएं च इत्थें इक जूनियर कमीशनर अफसर ते दो वीडिजी सदस्य शहीद होई गए हे। व्हाईट नाइट कोर दे जीओसी लेफ्टिनेंट जनरल नवीन सचदेवा होरें किश्तवाड़ सैक्टर दा दौरा लाया ते चला'रदे आतंकवादी रोधी अभियान दा जायजा लैता। सुरक्षाबलें आसेआ केशवन, कुंतवाड़ा ते एहदे आले-दोआले दे इलाकें च तपाशी अभियान चलाया गेआ ऐ।

<><><><><><>

### ADGP

जम्मू जोन दे अतिरिक्त पुलस महानिदेशक आनंद जैन होरें उधमपुर जिले दे बसंतगढ़ इलाके च सुरक्षा कारवाइएं दा व्यापक जायजा लैता जेहदा उद्देश्य इस इलाके च सुरक्षा सरबन्धी हालिया घटनाएं दी पछोक्डै च स्थिति दा पूरा पराता मूल्यांकन करना हा। ए.डी.जी.पी हुंदे इस दौरै दा मकसद पुलस बलें दिएं कारवाइएं सरबन्धी तैयारिएं दा बी मूल्यांकन करना हा तां जे बध्दिएं मजूदा चुनौतिएं दे चलदे आम नागरिकें दी सुरक्षा गी यकीनी बनाना हा। दौरै दौरान ए.डी.जी.पी होरें बसंतगढ़ पुलस थाने दा बी दौरा लाया ते विशेश कार्यबल एस.ओ.जी समेत बक्ख-बक्ख युनिटें दे अफसरें कन्नै बी गल्लबात कीती। गल्लबात दौरान मुख ध्यान संसाधनें दी दस्तयाबी, उपकरणें, पुलस कर्मिएं दी सिखलाई, खुफिया जानकारी कठेरने ते तुरत प्रतिक्रिया सरबन्धी तैयारिएं पर दिता गेआ।

<><><><><><>

## DY CM-Rajouri

उपमुख्यमंत्री सुरेंद्र कुमार होरें कल राजौरी जिले च प्रधानमंत्री ग्राम सड़क योजना, मैहकमा पीडब्ल्यूडी ते सीमा सड़क संगठन आसेआ तोड़ चाढ़े जा'रदे सड़क दे निर्माण सरबन्धी कम्में दी प्रगति ते रफ्तार दा जायजा लैता। एहदे लेई सददी गेदी इक जायजा मीटिंग दा मकसद जिले च जारी ढांचागत विकास सरबन्धी बक्ख-बक्ख परियोजनाएं गी तौलें ते मिथे गेदे समें दे अंदर-अंदर तोड़ चाढ़ना यकीनी बनाना हा। उनें इनें परियोजनाएं गी तोड़ चाढ़ने च पेश औने आहिलें दिक्कतें गी तुरत दूर करने लेई बी आखेआ।

<><><><><><>

## Sports-Minister

युवा सेवा ते खेड़ मंत्री सतीश शर्मा होरें हुनरमंद नौजाआनें गी बढ़ावा देने लेई सरकार दी बचनबद्धता गी दोहराया। उनें आखेआ जे कुसै बी व्यक्ति दा समूह गी खेड़ें दा राजनीतिकरण नेई करन दिता जाग। मंत्री होरें भरोसा दोआया जे योग्य खडारिएं गी समर्थन दिता जाग। जेड़े लोकें खेड़ इकाइयां या इदारे दा गलत इस्तेमाल कीताए उंदे खलाफ कार्रवाई कीती जाग। एह गल्ल उनें 14 बरें थ्वां हेठ दी श्रेणी आले तलवारवाजी प्रतियोगिता दा उद्घाटन करने मगरा आक्खी। मंत्री होरें इस आयोजन लेई सबबनें गी शुभकामनां दितियां।

<><><><><><>

## Labour-Commissioner

श्रम आयुक्त जेड़े फैक्ट्रिएं दे मुख निरीक्षक बी हैन, होरें सारे फैक्टरी मालकें, मैनेजरें ते होरनें मुतलका इकाइयां गी नोटिस जारी कीता ऐ तां जे एह लोक श्रम मैहकमे कश लोड़चदा पंजीकरण ते लाइसेंस सरबन्धी प्रक्रिया गी पूरा करी लैन। एह औपचारिकता कम्मगारें दी सुरक्षा, सेहत ते कल्याण लेई ऐ। जम्मू-कश्मीर च केई सारियां फैक्ट्रियां उद्योग ते बपार मैहकमे कश पंजीकरण न पर श्रम मैहकमें कन्ने लोड़चदियां औपचारिकता पूरियां नेई हैन। एह नोटिस उंदे लेई ऐ जिनें एह प्रक्रिया पूरी नेई कीती दी। श्रम आयुक्त होरें इस प्रक्रिया गी 20 दिनें अंदर पूरा करने लेई आखेआ ऐ। फैक्टरी मालकें जिंदा पंजीकरण ते लाइसेंस दी मेयाद पूरी होई गेदी ऐ ओह 7 दिनें दे अंदर-अंदर इसी पूरा करन तां जे कनूनी कार्रवाई थ्वां बची सकन।

<><><><><><>

## Soil-Health

उधमपुर आहले राई-बाई दफतरें च राई-बाई दे पूरे पराते विकास सरबन्धी प्रोग्राम तैहत मिट्टी दे नरोएपन दे प्रबंधन बारें इक रोजा जागरूकता शिविर ला गेआ। एहदा सरिस्ता राईबाई मैहकमें आस्सेआ कीता गेदा हा। जिले दी बक्ख-बक्ख थाहरें दे तकरीबन 100 करसानें एहदे च हिस्सा लैता। इनें करसानें गी माहिरें आसेआ

मिट्टी दे नरोएपन दे प्रबंधन बारे जानकारी बनायागेआ। इस दौरान सरबन्धी मैहकमें दे जम्मू निदेशालय दी टीम उत्थे मौजूद ही। इस मौके पर बोलदे हेई डिविजनल सायल सर्विसि अफसर सुरेश कुमार खजूरिया होरें आखेआ।

<><><><><><>

**World-Pneumonia Day**

विश्व निमोनिया ध्याड़े दे सिलसिले च कल उधमपुर दे सरकारी मेडिकल कालेज च इक कार्यक्रम दा सरिस्ता कीता गेआ। इस मौके मेडिकल कालेज दे प्रिंसीपल मृत्युंजय गुप्ता होरें नमोनिया बमारी दे बक्ख-बक्ख पैहलुएं पर लोऽ पाई। उनें डाक्टरें ते नीम डाक्टरी अमले गी निर्देश दिता जे नमोनिया दे बारे च बड़्डे पैमाने पर लोकें च जागरूकता फैलाने दा कम्म करन।

<><><><><><>

**JAKEDA**

जम्मू-कश्मीर उर्जा विकास एजेंसी, मैहकमा विज्ञान ते टेक्नोलॉजी दी तरफा साम्बा जिले च रामगढ़ दे पाखी मोड़ थाहर करसानें गी उर्जा बारे जागरूक करने गितै इक कार्यक्रम दा सरिस्ता कीतागेआ। कार्यक्रम दा मकसद इलाके दे करसानें गी उंदे खेतरे दी सिंचाई लेई इस्तेमाल होने आहिलएं बम्बिएं-पम्पें गी चलाने लेई बिजली दी थार सौर उर्जा दे इस्तेमाल गी बढ़ावा देना हा। साइंस ते टैक्नोलॉजी मैहकमे दे कमीशनर सौरभ भगत हुंदी सरपरस्ती च लग्गे दे इस जागरूकता कार्यक्रम च करसानें गी दस्सेआ गेआ जे ओह् अद्दी मैगावाट कोला लेइए 2 मैगावाट तोड़ी दी छमता आले ग्रिड कन्ने जुडत्रे दे सौर संयंत्र, खाली बैरन जिमिएं पर लाइए बिजली बेची बी सकदे न जेदे नै उनेंगी 40 लक्ख रपे फही मैगावाट साब्बै सलाना औंदन बी थहोई सकदी ऐ।

<><><><><><>